

Governu atribui lisensa ba empresa Iron Fortune halo peskiza ba minerál metáliku iha Oé-Cusse



Vise-primeiru Ministru no Ministru Koordenadór Asuntu Sosiál no Ministru Dezenvolvimentu Rurál no Abitasaun Komunitária, Mariano Assanami Sabino entega dokumenta lisensa Peskiza prospeasaun ba CEO Prinsipál Geologist, kompañia Iron Fortune Pty Ltd, Ross Brown.
Imajen Tatoli/Abílio Elo Nini

OÉ-CUSSE, 19 Abril 2024 (TATOLI) – Vice-Primeiru Ministru, Ministru Koordenadór Asuntu Sosiál no Ministru Dezenvolvimentu Rurál no Abitasaun Komunitária, Mariano Assanami Sabino, no Ministériu Petróleu no Rekursu Minerál, Francisco Monteiro, emite lisensa ba empresa *Iron Fortune Pty Ltd.* atu halo prospeasaun no peskiza ba rekursu minerál metáliku iha Rejiaun Administrativa Espesiál Oé-Cusse Ambeno (RAEOA).

Vice-Primeiru Ministru, Mariano Assanami Sabino, hateten atividade peskiza ida ne'e sai hanesan istória foun ida tan ba Timor-Leste, espesiál ba povu Oé-Cusse tanba hafoin halo iha munisípiu seluk, ohin, realiza iha Oé-Cusse.

Tuir Assanami, Governu tau importánsia ba setór produtivu tolu atu dezenvolve mak hanesan petróleu no minerál, agrikultura, no turizmu. “Petróleu ne'e setór produtivu. Governu nia pozisaun fó apoia tomak depoizde Lei Mineiru ne'e iha no tempu badak sei halo esplorasau no daudaun prospeasaun no peskiza ne'e importante ba Oé-Cusse. Imi koopera, tanba ita-nia rikusoin iha imi-nia rai no iha imi-nia hela fatin”, nia husu.

Governante ne'e hato'o parabéns ba esforsu ne'ebé Ministériu Petróleu no Rekursu Minerál (MPRM) no Autoridade Nasionál Minerál (ANP) nu'udar reguladora konsege implementa ona política ne'e. Tanba ne'e, nia fó hanoín ba liana'in, xefe suku no xefe aldeia sira, ba autoridade RAEOA no ekipa Zona Espesiál Ekonomia Dezenvolvimentu Oé-Cusse Ambeno (ZEEDOA) atu kolabora atividade ne'ebé halo iha Oé-Cusse.

Ministériu Petróleu no Rekursu Minerál, Francisco Monteiro, agradece ba apoia husi parte kompetene, tanba prosesu naruk to'o ohin loron entrega lisensa atu halo prospeasaun ba rikusoin minerál metáliku iha Oé-Cusse. “Ho investimentu ne'ebé kompañia halo iha ne'e, ho apoia entidade hotu rejionál no nasionál, ita hein katak tinan hirak mai bele deskobre, tanba iha ona indikasaun lubun kona-ba minerál”, dehan.

Tuir nia, emprezza sei aprofunda liután investigasaun sira-ne'e liuhusi teste oioin no ikus mai bele aserta loloos, katak rikusoin sira-ne'e sufisiente no ekonomikamente viavel atu dezenvolve.

“Ita espera, ho investimentu ne'e, sei kontribui ba dezenvolvimentu ekonómiku ita-nian, lori tan rendimentu mai ita-nia nasaun, nune'e bele sustenta ita-nia país, no bele mós kria postu traballu no atividade multiplikativa ba ekonómia nasionál”, nia espera.

Sekretáriu Rejionál ba Asuntu Administrasaun, André La'ó, representa Prezidente Autoridade RAEOA agradece ba Governu Sentrá tanba bele hili Oé-Cusse hodi halo prospeasaun no peskiza ba minerál metáliku.

“Ami apresia tebes tanba foin primeira véz akontese iha Oé-Cusse. Ami hakfodak tanba Oé-Cusse mós iha rekursu minerál barak, tanba ne'e nu'udar autoridade hamutuk ho povu presiza kontribui”, nia garante.

Tuir dadus husi ANP, área ba atividade prospeasaun no peskiza ba minerál metáliku iha Oé-Cusse iha rua, alvu mak sei kobre ouru ka osan-mean, manganés no osan-mutin.

Fatin dahuluk lokaliza iha sub-rejiaun Pante Makasar, iha suku Taiboko, aldeia Maquelab, Ulas, Nemun no Hauboni, no envolve mós sub-rejiaun Nítibe husi Sumi-Ufe, aldeia Cabana, Fuabano no Oélcaem, suku Usitaku iha aldeia Nítibe no Kuantua, suku Lela-Ufe iha aldeia Hau-Ufe ho área konsesaun MEL2023-CA-ZG004.

Fatin daruak, iha sub-rejiaun Nítibe iha suku Ban-Afi, aldeia Kuanobe no Hau-Tefo, envolve mós sub-rejiaun Pássabe, iha suku Abani, aldeia Haemnanu, Pássabe no Naetuna, inklui sub-rejiaun Oésilo iha suku Bobometo, aldeia Quibiselo no Tumin, suku Usiataqueno, iha aldeia Níbin ho área konsesaun MEL-CA-ZG007.

Hola parte iha seremónia atribuisaun lisensa prospeasaun no peskiza ba minerál metáliku ne'e xefe suku 18, xefe aldeia 63, membru autoridade RAEOA, veteranu, relijiozu, sociedade sivíl no Prezidente emprezza Murak Rai, EP, José Manuel Gonçalves, no Polísia Nasionál Timor-Leste, inklui abitante lokál sira.

Jornalista: Abílio Elo Nini Editora: Maria Auxiliadora

Autoridade RAEOA recomenda halo tuir kultura molok halo peskiza ba rekursu minerál



Sekretáriu Rejionál ba Asuntu Administrasaun, André Lao, representa Presidente Autoridade RAEOA, entrega dokumentu lisensa bá CEO Prinsipál Geologist, empresa Iron Fortune Pty Ltd, Ross Brown. Imajen Tatoli/Abílio Elo Nini

OÉ-CUSSE, 19 Abril 2024 (TATOLI) – Sekretáriu Rejionál ba Asuntu Administrasaun, André Lao, ne'ebé representa Presidente Autoridade Rejiaun Administrativa Espisial Oé-Cusse Ambeno (RAEOA), Rogério Tiago Lobato, rekomenda ba Governu Sentrák katak molok halo prospeasaun no peskiza ba rekursu minerál metáliku iha Oé-Cusse persiza halo tuir kultura hodi hetan matak malirin.

“Polítika ne'e kompeténsia Governu Sentrák mak fó lisensa, maibé liuhusi biban ne'e, ami husu de'it ba Governu, bainhira atu hahú halo ona esplorasauun ba rikusoin ne'ebé iha Oé-Cusse, ami persiza de'it konsidera kultura povu Atoni nian atu halo serbisu karik hetan matak malirin”, André Lao sujere iha ámbitu atribui lisensa prospeasaun no peskiza ba minerál metáliku ba empresa *Iron Fortune Pty Ltd.*, ne'ebé realiza iha otél Ambeno, Oé-Cusse, ohin.

Tuir nia, kultura ne'e importante tanba fatuk-lulik, bee-lulik no rai-lulik prezerva hela dezde bei-ala sira husi jersaun ba jersaun, tanba povu Atoni maioria moris ho kultura no fiar nafatin ba lulik sira-ne'e.

Hatán ba rekomendasaun ne'e, Ministru Petróleu no Rekursu Minerál (MPRM), Fransisco Monteiro, hateten Governu fó ofisiálmente lisensa no prosesu sira-ne'e empresa sei halo preparasaun no diskusaun kle'an ho Autoridade Nasionál Minerál molok hahú serbisu.

“Maibé munisipíu seluk kualkér esplorasauun iha minerál ka iha petróleu rasik tenke hahú ho rekoñesimentu, katak rikusoin sira-ne'e natureza ninian, ne'e ita-nia bei-ala sira husik, entaun ba parte kultura tenke hahú uluk mak foin tama investigasaun sira. Ita timoroan moris ho kultura, ne'e duni importante atu konsidera”, nia katak.

Tuir dadus husi ANP, área ba atividade prospeasaun no peskiza ba minerál metáliku iha Oé-Cusse iha rua, alvu mak sei kobre ouru ka osan-mean, manganés no osan-mutin.

Fatin dahuluk lokaliza iha sub-rejiaun Pante Makasar, iha suku Taiboko, aldeia Maquelab, Ulas, Nemun no Hauboni, no envolve mós sub-rejiaun Nítibe husi Suni-Ufe, aldeia Cabana, Fuabano no Oélcaem, suku Usitaku iha aldeia Nítibe no Kuantua, suku Lela-Ufe iha aldeia Hau-Ufe ho área konsesaun MEL2023-CA-ZG004.

Fatin daruak, iha sub-rejiaun Nítibe iha suku Ban-Afi, aldeia Kuanobe no Hau-Tefo, envolve mós sub-rejiaun Pássabe, iha suku Abani, aldeia Haemnanu, Pássabe no Naetuna, inklui sub-rejiaun Oésilo iha suku Bobometo, aldeia Quibiselo no Tumin, suku Usiataqueno, iha aldeia Nibin ho área konsesaun MEL-CA-ZG007.

Jornalista: Abílio Elo Nini

Editora: Maria Auxiliadora

João Gonçalves rekomenda ba empresa envolve Oé-Cusse oan iha peskiza mineral metáliku

OÉ-CUSSE, 19 Abril 2024 (TATOLI) – Koordenadór Zona Ekonómika Espesiál Dezenvolvimentu Oé-Cusse Ambeno (ZEEDOA), João Mendes Gonçalves, sujere ba empresa *Iron Fortune Pty Ltd.* atu loke postu traballu ba Oé-Cusse ona sira iha atividade prospesaun no peskiza ba rekursu mineral metáliku.

“Ha’u hato’o votu susesu ba kompañia, husu atu serbisu hamutuk ho ita-nia populasaun, husu mós atu kompleta saida maka ita-nia lei sira hateten kona-ba komponente lokál, kria postu traballu ba Oé-Cusse oan sira iha peskiza ne’e”, João Gonçalves ko’alia iha âmbito serimónia atribuisaun lisensa ba *Iron Fortune* atu halo prospesaun no peskiza ba mineral metáliku, ne’ebé realiza iha otél Ambeno, Oé-Cusse, ohin.

Koordenadór ZEEDOA ne’e salienta katak nia mós sei halo estudu hodi estabelese Zona Espesiál Ekonómia Sosiál Dezenvolvimentu iha Oé-Cusse Ambeno atu sai mós portavós ida ba iha povu Oé-Cusse.

Gonçalves husu mós ba empresa atu utiliza ekipamentu no transporte ne’ebé empregáriu lokál sira iha, nune’e bele fó oportunidade para dezenvole ekonomia iha iha Oé-Cusse. “Rekomendasun sira-ne’e maka ha’u hato’o ba empresa ne’ebé hetan tiha ona direitu hodi hala’o serbisu esplorasun mineral iha Oé-Cusse”, nia dehan.

Iha biban ne’e, Diretór-Ezekutivu empresa *Iron Fortune Pty Ltd.*, Ross Brown, promete sei serbisu hamutuk ho suku ne’ebé sai alvu ba prospesaun no peskiza mineral metáliku iha Rejiaun Admistrativa Espesiál Oé-Cusse Ambeno (RAEOA).

“Ami sei esforsu hodi serbisu hamutuk ho ita-boot sira durante atividade ne’e la’o. Ami iha esperansa boot atu hetan depóziitu mineral ekonómiku, ne’ebé sai hanesan prioridade boot iha futuru durante ami-nia kompañia halo esplorasun. Ami haree no foku liu ba área envolvimentu comunidade lokál, liuhusi kriaun postu serbisu direita no indireita”, nia promete.

Tuir nia, la’ós ne’e de’it, maibé mós dezenvolvimentu abilidade sira husi programa sira hanesan treinamentu no envolvimentu negósiu lokál nian.

Empregáriu internasionál ne’e relembra katak, iha tinan 14 liubá, ekipa boot ida hosi *Iron Fortune* ho nia dirijente sira halo vizita dahuluk mai Timor-Leste, iha tempu ne’ebá hafanun sira no iha iniciativa mosu iha ulun katak asaun saida maka bele halo iha Timor-Leste ba rikusoin sira iha rai-laran.

“Ohin loraun, Timor-Leste sai hanesan juridikasaun ba esplorasun mineral foun nian iha mundu, maibé menus husi esplorasun no nakonu ho konfiánsa boot, tan ne’e Iron Fortune sei foku liu ba iha esplorasun ouru ka osan-mean, manganés, osan-mutin no seluk tan”, nia salienta.

Tanba ne’e, *Iron Fortune* agradece ba Governu Timor-Leste no rai Timór, tanba fó ona fiar no lisensa atu serbisu hamutuk no promete katak sei hakruuk ba lei ne’ebé iha Konstituisaun atu hamutuk dezenvolve mineral rai-laran no dezenvolve Oé-Cusse sai furak liután.

Tuir dadus husi ANP, área ba atividade prospesaun no peskiza mineral metáliku iha Oé-Cusse iha rua, alvu mak sei kobre ouru ka osan-mean, manganés no osan-mutin.

Fatin dahuluk lokaliza iha sub-rejiaun Pante Makasar, iha suku Taiboko, aldeia Maquelab, Ulas, Nemun no Hauboni, no envolve mós sub-rejiaun Nítibe husi Suni-Ufe, aldeia Cabana, Fuabano no Oél-caem, suku Usitaku iha aldeia Nítibe no Kuantua, suku Lela-Ufe iha aldeia Hau-Ufe ho área konsesaun MEL2023-CA-ZG004.

Fatin daruak, iha sub-rejiaun Nítibe iha suku Ban-Afi, aldeia Kuanobe no Hau-Tefo, envolve mós sub-rejiaun Pássabe, iha suku Abani, aldeia Haemnanu, Pássabe no Naetuna, inklui sub-rejiaun Oésilo iha suku Bobometo, aldeia Quibiselo no Tumin, suku Usiataqueno, iha aldeia Nibin ho área konsesaun MEL-CA-ZG007.